

DEN AMBIENTE

Pa prome biaha den historia na Cristal FM...

TOP 200 PRESENTA PA IVO YANEZ Y CHANDO COLINA TABATA UN EXITO ROTUNDO..

**** Pa prome biaha den historia cu un TOP 200 a ser presenta aki na Aruba y cu a termina den un exito rotundo. Den un forma non stop e 200 cancionnan mas solicita durante aña 1997 a ser presenta pa Ivo Yanez y Chando Colina, cual a inicia for di dialuna 29 di december y a finaliza diamars anochi 30 di december cu un asistencia publico masal cu a paraliza John G Emanstraat por completo.**

Durante e anochi grandi aki tabata presente Buchi y su Grupo Tipico, kendenan a presenta envivo durante e Top 200, mientras cu e publico dilanti e studio di Cristal Fm tabata goza di e momentonan historico aki.

Prome cu a anuncia e cancion mas solicita durante aña 1997, cual a resulta "I Believe I Can Fly" di R. Kelly, un monster di pagara a explota John G Emanstraat di alegria, coriendo asina cu e fucu y yamando un bon aña 1998 pa Cristal Fm y henter pueblo di Aruba.

E exito rotundo di e Top 200 aki a ser demostra na e multitud cu tabata presente, demostrando asina cu e radio di e generacion nobo ta gozando di un sintonia grandi na Aruba.

DEN AMBIENTE ta felicita Ivo Yanez, Chando Colina, gerencia y crew di Cristal Fm pa e gran logro aki y tambe na e fiel oyentenan cu a haci Cristal Fm nan radio emisora mas gusta pa ya caba aña 1998..



**** Cu e champagne di mas caro na mundo marca CRISTAL, e hazaña historico di Top 200 a ser celebra den studio di Cristal Fm. E botter di champagne tabata cortesia di e dinamico manager di CHAMPAGNE Nite Club, Donald Rombley kende nos por aprecia cu e kelkie gigantesco, mientras por mira e personahe di noticia Robby Rosel cu e botter y Ivo Yanez y Chando Colina tras di nan microfono..**


SUPER ORQUESTA QUA-SI GRABANDO NAN HIT PROMOCIONAL PA E TEMPORADA DI CARNAVAL '98...



**** Aki por aprecia e maestro musico Chucho Hoek, Tatoo Quant y e joven ingeniero di studio Hubert Thiel..**



**** Criosisimo tabata e tremendo presentacion di Buchi y su Grupo di Paranda..**



**** Aki por mira e multitud grandioso cu a paraliza John G Emanstraat durante e historico Top 200 di Cristal FM...**

**** Mesora cu aña a boltu pa 1998, Super Orquesta Qua-Si a cuminsa drenta studio di Aruba Recording Studio, pa asina inicia cu nan grabacion pa e produccion di temporada di carnaval.**

Ayera DEN AMBIENTE a sorprende Tatoo, Chucho Hoek y Hubert Thiel den pleno grabacion den Aruba Recording Studio.

For di e maestro musico Chucho Hoek por a com-pronde cu si tur cos bay bon

na tempo, e hit promocional cual lo bay ta un calypso, lo cuminsa resona riba nos radio emisoranan dentro algun siman.

Tatoo tambe a declara na DEN AMBIENTE cu e aña aki si e lo bin mas duro cu nunca, tanto riba e produccion aki como durante e festival di Calypso & Roadmarch Contest.

Mientrastanto por a com-pronde tambe for di e talentoso joven musico Hubert

Thiel kende ta director musical di Super Orquesta Qua-Si, cu ya caba e agenda di Qua-Si ta casi full di boek pa e temporada di carnaval, cu ta haci tambe cu e grabacion pa e produccion aki un poco trabahoso.

Esaki ta haci cu e integran-tenan di Qua-Si mester bay sacrifica hopi di na tempo liber pa realiza e produccion aki na tempo pa e tempora-da di carnaval '98.

HOPI BON COMENTARIO PA E TREMENDO PROGRAMA "ANTAÑO DI FIN DI AÑA" CU CHICO CROEZE..

E demanda ta grandi pa sigui cu e programa..

DEN AMBIENTE



** Hopi bon comentario mès DEN AMBIENTE a ricibi for di masha hopi hende pa e tremendo programa di Chico Croeze na Top FM 95 "Antaño di Fin di Aña". E programa aki a trese hopi nostalgia y grato recuerdonan serca nos grandinan, kendenan a keda sumamente encantada cu e fantastico programa aki di Chico Croeze.

E sabor di e programa aki a haci un impacto asina grandi, cu tur dia ta drenta yamadan na Top 95 pa Chico Croeze sigui cu e programa. Durante e programa antaño aki, Chico Croeze ta rebiba e dushi tempo glorioso di nos grandinan cu su disconan for di aña 1940 bin ariba te cu aña 1980.

E legendario viviente di Drag Race, reconoci como un di e pilotonan mas destaca cu un curashi increíble den e mundo di puestamento di auto, a demostra cu no ta den e mundo di pusta auto so e ta un campeón, pero tambe tras di e microfono di radio difusion, ta un placer pa scucha Chico Croeze basila.

Den e mundo di radio difusion Chico Croeze tin amplio experiencia trahando for di aña 1957 cu Radio Kelkboom, despues pa Voz di Aruba, Radio Antiyana, Radio Carina y hasta na aña 1960 tabata tin su propio programa educativo "Ora Zodiac" na Tele Aruba.

Actualmente pa dos aña consecutivo Chico Croeze tin su exitoso programa di Drag Race "Den 5 Speed" na Top FM 95, cual programa cu su amplio experencianan ta estimula e jovennan den e caminda corecto di Drag Race.

Pa haci e festival di Dande, Tipico y propio Composicion mas atractivo y agradable..

FESTIVAL DI DANDE Y TIPICO MESTER BIRA UN FIESTA BAILABLE..



** Otro aña nos maximo evento cultural, Festival di Dande, Tipico y propio Composicion lo bay cumpli cu su 25 aña di existencia. For di e organizadornan DEN AMBIENTE por a compronde cu esaki lo bay ser celebra engrande, na unda tur e Reynan eterno lo bay topa cu otro.

For di awor caba mester cuminsa cu un campaña di promocion, naturalmente lagando e temporada di carnaval pasa, pa asina inmediatamente inicia cu e preparacionnan "NA CAMINDA PA E DI 25 FESTIVAL DI DANDE".

Un consejo cu DEN AMBIENTE ta haci na e organizadornan, pa den futuro propaganda e festival folklorico aki como uno bailable, pa asina durante e casi cinco oranan largo, e publico sinta no fada nan mes y bandona e festival prome cu saca e ganadornan. Ningun hende no por bin bisa nos, cu e tradicion di un Dande ta cu bo mester ta sinta.

DEN AMBIENTE cu pa varios añanan caba ta cubri e festival aki den su totalidad, kedando te den e oranan di mainta pa warda e resultado, a experiencia den hopi ocasion y e aña aki tambe tabata e

mesun caso cu na e final culminante bo ta haya un publico masha limita y esaki naturalmente ta trese un sabor un poco amargo pa e ganadornan, kendenan merece di ser ricibi cu aplausonan fuerte di un gran publico.

Pa haci e festival mas divertido y agradable, hasta por organiza un contest di baile entre e publico, pa esun cu por baile e Tipico mas mihor. Na Aruba nos tin suficiente bailarinnan profesional cu por asisti como hurado. Sin duda cu esaki lo crea un interes masha grandi y alaves lo haci e festival mas interesante, divertido, placentero, agradable y e publico lo keda festeha nos tradicional festival te na final. Pues organizadornan, ata un bon consejo pa rebiba e festival di Dande, porfavor NO bisa CU NO POR, pero bisa cu SI POR...

GALI GALIANO DIA 4 DI APRIL 1998 DEN CITY ONE..

** Informacionnan cu a yega na mesa di redaccion di DEN AMBIENTE ta bisa, cu e popular cantante colombiano Gali Galiano, lo ta na Aruba e aña aki pa prome biaha pa un solo show cu su "Mariachi Clasico". E unico presentacion di e gran cantante aki lo bay ta diasabra 4 di april 1998 den City One.

Despues di a cosecha varios exitonan cu su cancionnan romantico, aña 1997 Gali Galiano a dal durisimo cu su super hit "Me Bebi tus recuerdos". E cancion aki su impacto tabata asina grandi aki na Aruba cu den casi tur festivalnan di canto e tabata ser interpreta. Tambe hasta e cancion aki a ser traduci na papiamento pa e gran cantante Arubano Tommy de Cuba.

Segun DEN AMBIENTE por a compronde cu durante e show aki, lo bay tin presentacion di nos artistanan local kendenan lo bay ta e popularisima Yolanda v/d Linde cu Mariachi Perla di Aruba y e dos joven cantantenan Sherida Paesch (yiu muher di Yolanda) y Edward v/d Biezen.

Keda pendiente pa mas informacion tocante e unico-presentacion di e popular cantante romantico GALI GALIANO..

